

ANG

Bayan

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Edisyong Hiligaynon
Tuig LVII No. 8
Abril 21, 2011
www.philippinerevolution.net

Editorial

Ipautwas sa Mayo Uno ang kaakig batuk sa rehimeng US-Aquino

Lubos nga matarung nga dumdumon ang maabot nga Mayo Uno bilang Adlaw sang Kaakig. Nagakadapat lamang nga ipautwas sang masang anakbalhas kag pumuluyong Pilipino ang ila kaakig sa rehimeng US-Aquino.

Madasig nga naga-us ang pangabuhian sang mga mamumugon kag pumuluyo. Makaligad ang halos isa ka tuig sa idalom ni Aquino, tanan nga mga promisa nga pagbag-o wala sang gindulot nga pag-ayo sa pangabuhian sang pumuluyo.

Sa sulod lang sang pila ka bulan halin nga nagpungko si Aquino, nagsaka na sang masobra 15% ang presyo sang mga pangunahon nga balaklon kag serbisyo. Wala siya sang ginhimo nga kontrolon ang presyo. Siya pa mismo ang nagtulod sang sukot sa mga tren kag *expressway*. Nangin inutil siya sa atubang sang nagapadayon nga pagtaas sang presyo sang mga produktong petrolyo. Ginapabay-an niya nga magtimbuok ini bangud sa daku nga buhis nga makolekta sang iya gubyrno halin diri. Nagapa-inosente siya sa pag-antus sang banwa.

Kon anu-ano nga tiko nga rason ang ginahaboy ni Aquino para balabagan ang signipikante nga pagpataas sang sweldo. Kaladlawan nga ginapamilit niya nga tuman kanubo lang sang tantos sang implasyon gani indi kinahanglan nga pataasan ang minimum nga sweldo! Baliskad ini bisan sa mga ginduktor nga datos sang mga ahensya sang gubyrno.

Ginapahug sang daku nga kapitalista nga ang ginapakig-

bato nga P125 nga pagtaas sang sweldo magapadaku kuno sa tantos sang implasyon. Ginainsister man nila nga makaputo ini sang gamay nga mga negosyante kag magaresulta sa labi nga pagdamo sang wala sang trabaho.

Kadaluk sa ganansya ang matuod nga ara sa likod sang pagbalabag sa P125 *across-the-board* nga pagtaas sa sweldo. Ang matuod nga katumbas lamang ini sang 15% sang ganansya sang kadam-an nga mga kapitalista sa Pilipinas. (Lantawon ang kaangut nga artikulo.) Pero indi ini basta-basta ihatag sang mga daluk nga kapitalista nga nagakabuhi sa balhas kag dugo sang mga mamumugon.

Ang pagbalabag ni Aquino sa singgit para sa matarung nga sweldo nakasandig sa dikta sang tunay niya nga mga "boss", ang mga imperyalista kag lokal nga burgis kumprador nga nag-amot sang daku nga kantidad sa iya kampanya. Interes



**Mga tampok sa
isyu nga ini...**

Unyon, nagpaabot
sa NDFP PAHINA 3

Pasidungog
kay Ka Toklai PAHINA 7

Protesta sa bilog nga
kalibutan PAHINA 11

nila ang ginasakdag ni Aquino sa wala kakapoy nga pagtulod niya sa programa nga pribatisasyon kag pagbuhin sa badyet sang gubyerno sang mga galas-tuhan sosyal.

Dapat ibuyagyag, pakamalauton kag tapuson na ang pagpaniplang kag pagpanunto sa mga mamumugon nga Pilipino sang rehimeng Aquino, sang mga “boss” sini nga daluk sa ganansya kag mga propagandista nila.

Dapat maathag nga tumuron sang kahublagan sa pagpangabudlay ang responsibilidad sang rehimen sa pagpataw sang kontra-mamumugon kag kontra-pumuluyo nga polisiya nga nagapabug-at lang sa ila mga palas-anon.

Dapat ipahibalo sa masang anakbalhas kag iban pang pigos kag ginahimuslan nga wala sila sang masaligan sa rehimeng US-Aquino. Sa baylo, ini ang masupog nga nagapatumang sang mga layi kag polisiya nga makaguba sa ila interes.

Dapat maghugpong ang sahing obrero kag iban pang pumuluyo sa malapad nga alyansa nga magadala sa ila mga komun nga interes kag magaduso sang ila kolektibong demanda. Dapat nga ipautwas nila ang kaakig nga nagatipon sa dughan sang banwa. Dapat

nila nga bun-agon ang isa ka makagagahum nga kahublagang protesta para ipakigbato ang interes sang masang anakbalhas kag sukton ang rehimen kag tanan nga iban pa nga nagapaantus sa banwa.

Katungdanan sang sahing mamumugon kag sang ila proletaryong partido nga pamunuan ang paghimakas batuk sa tanan nga kontra-mamumugon kag kontra-pumuluyo nga mga polisiya sang rehimeng Aquino.

Dapat matalum nga iguhit sa paminsaron sang masang mamumugon nga ang ila paghimakas para sa dugang nga sweldo kag iban pang halambalanon sa pangabudlay kabahin sang mabaskog nga banggianay sa tunga sang sahing kapitalista kag mamumugon, kag sang kabilugan nga nagaharing sahi kag pumuluyo. Kongkreto sini nga ginalaragway ang kahulugan sang pagpanghimulos kag pagpamigos. Matingkad sini nga ginatudlo sa masang anakbalhas kag iban pang ulipon nga saray kag sektor ang “matuwid na daan” (tadlong nga dalan) para sa tunay nga pagbag-o. Ini ang dalan sang militante nga pangmasa nga paghimakas kag rebolusyonaryo nga pagbato. **AB**

Matarung ang singgit para sa P125 dugang nga sweldo


Ang pagpasar bilang layi sang P125 dugang nga adlawan nga sweldo sang obreros kag P 6 , 0 0 0 dugang sa bulanan nga sweldo sang mga empleyado sa gubyerno pila ka tuig na nga ginapakigbato sang demokratiko nga kahublagang masa sa pungsod.


Tuyo sang paghimakas para sa dugang sa minimum nga sweldo nga hatagan sang bisan temporaryo nga alibyo sa nabudlayan na gid nga mga mamumugon. Ginapakig-away sini ang disente kag makabuhi nga sweldo para sa ila mga pamilya. Sa sini ginaduso ang kinamatarung nga mabuhi sang disente ang ginapakigbato sang sahing mamugon sa 100 ka tuig na sini nga paghimakas.


Ang ginademanda nga P125 nga dugang gamay nga pagadyas lang sa kadasig sang pagtaas sang mga presyo. Kon usisaon, kulang katama ini agud makabulig ang sweldo sang mga mamumugon sa madasig nga pagtaas sang presyo sining mga nagligad nga tuig.

Lubos nga ginabalabagan sang daku nga kapitalista kag sang nagaharing rehimen ang matarung nga demanda nga ini. Ginapahug nila ang pumuluyo nga ang amo nga dugang magapataas sa gastos sa produksyon kag magatulod sa pagtaas sang mga balaligyaon. Ang matuod indi lang nila gusto nga mabuhinan ang ila ganansya.

Suno sa pagtuon sang IBON Foundation, sang 2008 P895.2



<div><p>Tuig XLII No. 8 Abril 21, 2011</p><p>Ang <i>Ang Bayan</i> ginapagwa sa leng-gwahe nga Pilipino, Bisaya, Iloko, Hiligaynon, Waray kag Ingles.</p><p>Mahimo ini nga i-download halin sa Philippine Revolution Web Central nga makita sa:</p><p>www.philippinerevolution.net</p><p>Nagabaton ang <i>Ang Bayan</i> sang mga kontribusyon sa porma sang mga artikulo kag balita. Ginabuyok man ang mga bumalasa nga magpaabot sang mga saway kag rekomendasyon sa ikauswag sang aton pahayagan. Malab-ot kami paagi sa email sa:</p><p>angbayan@yahoo.com</p><p>Ang <i>Ang Bayan</i> ginabantala duha ka beses kada bulan sang Komite Sentral sang Partido Komunista sang Pilipinas</p></div>	
Kaundan	
Editorial: Ipautwas ang kaakig sa rehimeng US-Aquino	1
Dugang nga saka, matarung	2
Unyon, nagpaabot sa NDFP	3
Piket sg unyon sa Davao City	3
24 patay, 3 pilason	4
Report halin sa ST	5
Padilla, ginpakamalaut sg NDFP	6
Pasidungog kay Ka Toklai	7
2 aktibista, ginpatay	8
Caravan batuk sa Balikatan	9
“Makatawo” nga interbensyon	10
Lapnagon nga protesta	11
Krisis sa Portugal	12
Balita	13



bilyon nga ganansya a n g ginkuripon sang mga empresa nga may 20 empleyado pataas. Kon ginpatuman ang P125 dugang nga sweldo, madugangan sang P135 bilyon ang kabilugan nga gasto sang mga kapitalista.

Kon amo, may mabilin pa sa ila nga P759 bilyon nga ganansya kag 15% lang ang mabuhin sa ila ganansya. Sa Metro Manila, 17.3% lang ang mabuhin. Kag sa 1,000 pinakamanggaran nga korporasyon, nga nag-angkon sang 500% nga pagtaas sang ila kita halin 2001 isa ka tulo lang ang porsyento nga mabuhin sa ila daku nga ganansya. **AB**

Unyon, nagpaabot sa NDFP

Ginpaabot sang unyon sang obreros sa Dole Philippines Inc. (Dolefil) sa *negotiating panel* sang National Democratic Front of the Philippines (NDFP) ang mga isyu nga ginaatubang subong sang obreros sa pungsod. Ginhingyo sang Amado Kadena-NAFLU-KMU nga iupod sa adyenda sang pagsugilanon sa tunga sang NDFP kag sang Gubyerno sang Pilipinas (GPH) ang grabe nga pagpang-himulos kag pagpaniplang sang maneydsment sang Dolefil kag ang pagpang-agaw sini sang malapad nga duta sa General Santos City.

Suno sa unyon, bagay nga ilakip ang mga isyu sang obreros sa negosasyon sa mga reporma nga sosyo-ekonomiko. Gusto man nila nga ipresentar bilang adyenda ang lapnagon nga kontraktwalisasyon, paglapas sa mga kinamatarung sang obreros, paglansang sang sweldo kag iban pa nga isyu sang obreros.

Ginaduso man sang unyon nga dapat bawion sa kontrol sang Dolefil ang masobra 30,000 ektarya nga kadutaan nga ginpatamnan sini sang pinya kag saging. Suno sa Ama-

do Kadena, modernong porma lang ini sang konsentrasyon sang duta sa kamot sang pila sa kahalitan sang mga mangunguma kag gamay nga tag-iya sang duta.

Kadungan sini, ginkundenar sang unyon ang mga pagpang-ipit kag hayag nga pagdinaya sang Dolefil kaangut sa eleksyon para sa *union certification* nga ginhiwat sang Pebrero. Lapnagon nga *vote-buying* kag pagpamahug sa mga myembro sang unyon. Ginpaggwa man sang kumpanya nga nagdaog sa eleksyon ang unyon nga maki-maneydsment. **AB**

Piket kontra sa pagbungkag sang unyon, ginhiwat sa Davao City

NagpiKET ang 300 obreros nga katapu sa Kahugpungan sa mga Trabahante sa Superstar (KTS) kag ila mga pamilya sa atubang sang planta sang Superstar Coconut Products Inc. sa Baryo Maa, Davao City sang Abril 1. Ginkundenar nila ang pagpanuhol, pagpamigos kag pagpang-ipit sang maneydsment agud bungkagon ang ila unyon.

Partikular nga ginapamatukan sang obreros ang pagpanuhol sang kumpanya para sa temprano nga pagretiro nila. Ginasuhulan sila sang kumpanya sang P3,500 kada bulan sa *separation pay* (abereyds nga P29,000/tuig) para batunon ang tanyag nga temprano nga pagretiro. Ginapalapta man sang kumpanya nga magasara na ang pabrika pag-abot sang Abril 9 para indi na magsulod ang obreros. Pag-abot sang adlaw nga ina, nagkuha ang

kumpanya sang obreros halin sa isa pa sini ka pabrika sa Butuan para padayunon ang mga operasyon.

Kadam-an sa gintarget sang kumpanya sa mga temprano nga pagretiro ang mga myembro sang unyon. Daku ang kaakig sang maneydsment sa unyon labi na sunud-sunod ini nga nag-agum sang kadalagan halin sang matukod ini. Ginpakigbato sang unyon ang ila mga kinamatarung sa pihak sang kahimtangan nga kontrak-

twal ang mga mamumugon.

Sugod nga tukuron ini sang Nobyembre 2010, nangin aktibo ang unyon sa paghimakas para sa mga kinamatarung kag kaayuhan sang obreros. Napataas nila ang ila sweldo sa pihak sang pagduso sang kumpanya nga indi ini direkta nga amo sang obreros kundi ang ahensya nga nagrekrut sa ila. Napamatud-an sang obreros nga ang ahensya nga ini prente lang sang kumpanya kag napilitan ang maneydsment nga makig-negosasyon sa ila. Sang Marso 2011, ginkilala sang DOLE ang unyon. Ginaduso sini subong nga ihatag sang kumpanya sa mga mamumugon ang ila mga benepisyo.

Bilang sabat, ginapatumang sang kumpanya ang pilit nga pagparetiro sang mga unyonista. Ginpasingki man sini ang pagpamahug indi lang sa sulod sang pabrika kundi pati sa komunidad sang obreros. **AB**



24 suldado napatay, 3 napilasan sa Abra kag Agusan del Sur

Magapasikat tani ang AFP kay Benigno Aquino III kag amo nila nga imperyalismong US bahin sa Oplan Bayanihan pero nag-uli sila sang madamo nga kaswalti halin sa mga operasyon militar nila sa Abra kag Agusan del Sur sadtong katapusan sang Marso kag una nga simana sang Abril. Bunga ini sang ginatigayon nga mga kontra-opensiba sang Bag-ong Hangaway sang Banwa (BHB) batuk sa Philippine Army sa Ilocos-Cordillera Region (ICR) kag sa Northeastern Mindanao Region (NEMR).

Sa NEMR. Nag-abot sa 17 ang napatay sa 29th IB sang sug-alawon ini sang mga operasyon isnayping kag ambus sang BHB sa idalom sang Front 19 sang NEMR sa Baryo San Isidro, Marihatag, Agusan del Sur sang Marso 30 kag 31, suno kay Ka Maria Malaya, tagapamaba sang National Democratic Front-NEMR. Kadam-an sang mga kaswalti sang kaaway ang resulta sang *misencounter* sa tunga sang duha ka kolum sang kaaway nga pareho nga natarantar sa atubang sang mga pagsalakay sang BHB.

Tatlo ka kolum sang militar ang nagsalakay sang umpisahan nga labugayon sang 29th IB ang

mabukid nga parte sang Baryo San Isidro sang Marso 30. Upod diri ang pila ka bag-ong gradweyt sang Philippine National Police Academy. Pag-abot sang alas-6:30 sang hapon, gintublag sang mga isnayper sang BHB ang una nga kolum sang Philippine Army kag gilayon nga napatay ang apat nga suldado.

Masunod nga adlaw, mga alas-7:30 sang aga, gin-ambus man sang BHB ang ikaduha nga kolum sang militar gamit ang *command-detonated explosives*. Nagtuyo magtabang ang ikatlo nga kolum nga sadto ara sa ibabaw nayon sang gin-ambusan nga ikaduha nga kolum. Wala ini sang iban nga maagyan kundi ang ginapususyunan sang ikaduha nga kolum.

Bandang alas-7:45 sang aga nabatian na lang sang BHB nga naglukpanay na ang duha ka kolum sang militar. Naglawig ang *misencounter* tubtob alas-12 sang udto-adlaw. Mga alas-11 sang aga, nag-abot ang duha ka helikopter kag gin-istraping ang lugar sang inaway. Walo ka beses man

nga nagpalupok sang mortar ang mga suldado. Nagdamo ang mga kaswalti sang kaaway bangud sa *misencounter* nga ini, siling ni Ka Malaya. Diri naghalin ang 13 pa nga kaswalti sang kaaway.

Sa ICR. Pito man ang napatay kag tatlo ang napilasan sa mga pasistang tropa sa serye sang mga taktikal nga opensiba nga ginlunsar sang BHB sa idalom sang Agustin Begnalen Command (ABC) sa Tubo, Abra sang Marso 29 tubtob Abril 2. Dugang diri, nasamaran sang BHB ang duha ka helikopter sang AFP, suno kay Ka Diego Wadagan, tagapamaba sang ABC-Abra.

Mga alas-3:45 sang hapon sang Marso 29, ginpalapitan kag ginpalukpan sang BHB ang mga tropa sang 50th IB nga masako sa pagsunog sang mga kohon kag kahoy nga gingamit sa paghimo sang mga payag sang BHB sa isa ka abandonado na nga kampo sa Mt. Layaban, Sityo Beew, Baryo Alangtin sa banwa sang Tubo. Bunga sini, nagdugang sang tropa ang militar. Ginharas sila sa Mt. Layaban mga alas-3:15 sang hapon sang Marso 31. Sa duha ka inaway nga ini, nag-agum ang kaaway sang duha nga patay kag duha nga pilason.

Nag-agum sang daku nga kaswalti ang kaaway sang Abril 1 sang maambus ang isa ka platoon sang 50th IB samtang padulong ini sa gin-abandona nga nga kampo sang BHB. Lima pa ang napatay kag isa pa ang napilasan sa ambus nga ini.

Gintilawan nga kuhaon sang duha ka helikopter ang ila mga kaswalti alas-9:20 sang aga sang Abril 2 pero napaslawan nga maghugpa ang mga ini sa Mt. Layaban bangud ginsug-alaw ini sang mga bala. Napilitan ini nga magpalayo sa lugar bangud nasamaran na ang duha ka helikopter.

AB




Puhunan para sa paglukso sa bag-ong lebel sang inaway banwa

Nagmadinalag-on ang Partido kag Bag-ong Hangaway sang Banwa (BHB) sa pagpreserba sang kritikal nga kusog sini sa kaumhan kag kasyudaran sang Southern Tagalog (ST) sa pihak sang wala kaparis nga brutalidad sang Oplan Bantay Laya (OBL) I kag II. Ang mga kadalag-an nga ini amo ang puhunan sang rehiyon para sa pag-amot sa pungsodnon nga pagtinguha nga makasulong ang inaway banwa padulong sa bag-o kag mas mataas nga lebel sa sulod sang lima ka tuig.

Sa pahayag sini nga ginpag-wa sang Marso 29, ginreport sang rehiyunal nga pamunuan sang ST nga napabilin sang BHB ang masobra 10 prenteng gerilya sini sa atubang sang siyam ka tuig (2001-2011) mapintas nga kampanyang militar sang kaway. Bunga sini, napan-gibabawan kag napanday ang BHB kag rebolusyonaryong pumuluyo sa pinakamabudlay nga kundisyon sang pagpakig-away.

Partikular lang sa Calabarzon (Cavite, Laguna, Batangas, Rizal

kag Quezon), masobra napulo ka batalyon nga tropa sang Armed Forces of the Philippines (AFP) kag Philippine National Police (PNP) ang nakade-ploy diri, luwas pa sa pila ka batalyon sang CAFGU kag espesyal nga paramilitar sa mga engklabong industriyal. Sa Mimaropa (Mindoro, Marinduque, Romblon



Palawan) may pwersa sang Philippine Marines, luwas pa sa Philippine Army, PNP Special Action Force (SAF) kag CAFGU.

Sa pihak sang daku nga numero sang gintambak nga tropang militar sa rehiyon, nakalunsar ang BHB diri sang masobra 60 taktikal nga opensi-ba kag aksyong militar. Sa Calabarzon, sa sulod sang 18 bulan paliwat-liwat nga nahalitan sang BHB ang mga pasistang tropa. Nakalunsar ang isa ka prenteng gerilya diri sang 31 taktikal nga opensi-ba kag aksyong militar kon sa diin 17 kaway ang napatay kag anum ang napilasan, lakip ang duha ka

ahente sang Intelligence Service of the AFP. Nakagaw ang mga yunit gerilya sang pito ka M16, apat ka shotgun kag napulo ka pistola.

Sa isa naman ka prenteng gerilya, sa 18 taktikal nga

“Report...” sundan sa p.6

NIA sa Davao, ginkastigo sang BHB

Gin-abangan kag ginpauli sang 1st Pulang Bagani Company sa Gidalum sang Merardo Arce Command sang Bag-ong Hangaway sang Banwa sa Southern Mindanao Region ang walo ka tinawo sang National Irrigation Administration (NIA) sang Marso 21 sam-tang nagahiwat sang pulong sa Baryo Mapula, Paquibato District, Davao City.

Pagkastigo ini sa NIA sang BHB bilang instrumento sang rebolusyonaryong gubyerno sang banwa bangud ginati-plang sini ang mga pumuluyo bahin sa proyekto nga irigasyon, suno kay Ka Parago, kumander sang 1st Pulang Bagani Company. Sa kamatuoran, ang mga mapanghalit nga kumpanya sang mina ang sa likod sang proyekto nga ini.

Ginkumpiska man sang BHB ang dala nga salakyan, duha ka kamera, mapa, NIA *petition forms*, NIA *membership agreement* kag *identification cards*

sang NIA. Ang mga ini ara sa pag-amlig sang rebolusyonaryong masa tubtob sa may maipakita ang NIA nga dokumento nga lubos magapaathag sa matuod nga katuyuan sang nasambit nga proyekto.

Madamo nga palamangkutanon bahin sa proyektong irigasyon nga ini bangud ara sa erya ini sang “mining claim ang exploration” sang Alberto Mining Corporation nga nagasakup sa 8,391.7642 ektaryas sa Baryo Mapula, Lumiad kag Salapawan.

Maluwas sa Mapula Commu-

nal Irrigation Project, may iban pang proyekto ang NIA sa Sityo KTC, Baryo Malabog kag Sityo Labo, Baryo Tapak nga ara man sa sulod sang ginaangkon nga erya sang PENSON kag Superfield Mining Corporation.

Indi mapanginpuslan sang komunidad sang Paquibato ang proyekto bangud nakategorya ang lugar nga ini sa “minimal Potential Irrigable Areas” o mga lugar nga mabukid, mabulod kag madamol ang deposito nga apog.

Indi matuod ang ginasiling sang NIA nga libre ang proyekto bangud ang mga benepisyaryo ginapa-pirma sa *membership agreement* kag *petition letter*. Lakip sa ginpirmanhan nga “NIA terms and conditions” ang obligado nga bayaran ang irigasyon sa bug-os nga panahon sang kontrata. **AB**

opensiba kag aksyon militar nga nailunsar diri 22 ang napatay sa kaaway kag 17 napilasan. Kag sa isa pa gid nga prenteng gerilya, nakalunsar sang 14 taktikal nga opensiba lakip ang tatlo nga separado nga ambus batuk sa mga elemento sang 3rd Special Action Force sang PNP. (Partikular sa tatlo ka inaway nga ini, walo ang napatay sa 3rd SAF-PNP kag nakaagaw sang walo nga M16 kag tatlo ka pistola.)

Samtang, sa Mimaropa, sig-nipikante ang amot sini sa liwat nga pagbawi sang kusog sang BHB sa bilog nga rehiyon bangud sa paghigot kag paglapta sini sang manipis sa mga pwersa sang kaaway. Sa sulod sang isa ka tuig, nakalunsar ang BHB diri sang 12 taktikal nga opensiba. Gindugmok sang isa ka platun sang BHB ang 22-katawong pwersa sang 23rd Division Reconnaissance Coy. Sa inaway nga ini, nakakumpiska ang BHB sang 17 mabaskog nga armas lakip ang 11 M16, tatlo nga M14, duha ka M203 *grenade launcher*, isa ka K3 SAW (Special Warfare Automatic Weapon) kag isa ka M60 *light machinegun*. Naagaw man ang madamo nga bala kag kagamitan militar pareho sang 4 radyong Falcon Harris.

Sa iba pang taktikal nga opensiba, nareyd nga wala sang lupok ang isa ka *police substitution* kon sa diin nakaagaw sang isa ka M16 kag apat ka pistola, kag gin-ambus ang duha ka trak sang Philippine Marines kon sa diin 6 ka tropa ang napilasan.

Pila ka pulo ka libo nga mangunguma man ang nabenepisyuhan sa mga kadalag-an sang rebolusyong agraryo kag mga paghimakas antipyudal. Base sa napundar nga kusog sang rebolusyonaryong pumuluyo, ginpatuman sang BHB sa pila ka lugar ang kumpiskasyon sang duta sang agalon nga mayduta kag ang libreng pagpanagtag sini sa mga

Padilla, ginkastigo sang NDF

Gin-akigan sang National Democratic Front of the Philippines (NDFP) si Atty. Alexander Padilla, tagapangulo sang Negotiating Panel sang Government of the Philippines (GPH), kaangut sa pila ka “probokatibong” komentaryo sini nga wala sang lugar sa negosasyon pangkalinungan. Siling ni Padilla, indi na kuno makarekrut ang rebolusyonaryong hublag sang mga edukadong paman-on bangud mas nabuyo na ang mga ini sa *internet*.

Suno kay Fidel V. Agcaoili, pinuno sang NDF Human Rights Committee, ginapakita lang ni Padilla nga bulag siya sa riyalidad. Tuman kadamong mga *website*, *blog* kag Facebook *account* nga ginagamit sang mga organisasyong masa kag personahe para palapnagon ang mensahe sang pungsodnon-demokratikong kahublagan sa pumuluyong Pilipino. Gintumod ni Agcaoili ang Philippine Revolution Web Central, ang Paaralang Jose Ma. Sison, mga *account* sa Facebook ni Marco Valbuena kag mga nagasupporta sa *Ang Bayan*, mga rebolusyonaryo kag progresibong bidyo sa YouTube kag madamo nga iban pa.

Ang maayo nga paggamit sang mga ini sang rebolusyonaryong kahublagang Pilipino pamaagi para sa pagpalapnag sa mensahe sang pungsodnon-demokratikong rebolusyon antes pa man ini mareport sa mga lokal kag internasyunal nga pahayagan.

Ang “probatikatibong” komentaryo nga ini ni Padilla kasugpon sang nauna niya nga pagpahayag sang pagduda sa sinseridad sang NDFP nga agumon ang pangpulitika nga pagkasugot sa atubang sang nagasingki nga gera sibil sa pungsod. Ang pagpamilit niya sa tatlo ka tuig nga dedlayn para tapuson ang sugilanon pangkalinungan nakasamad sa subong nga negosasyon bangud masabotahang ini sang mga pwersang militarista nga interesado lang sa kapaslawan sang sugilanon pangkalinungan kag sa todo-larga nga gera nga ginbalay sang Oplan Bayanihan.

Dapat mahibal-an ni Padilla nga ang kadalag-an o kapaslawan sang sugilanon pangkalinungan ara sa abaga sang rehimeng Aquino kag indi sa NDFP, pahayag sang Partido Komunista sang Pilipinas. Imbes magpagwa siya sang mga makahalalit nga pahayag, dapat tum-ukan niya sang pagpangita sang mga kalubaran sa halambalanon sang reporma sa duta kag pungsodnon nga soberanya, lapnagon nga disempleyo kag kagutuman nga amo ang ugat sang gera sibil. AB

mangunguma para italauma.

Ang rebolusyonaryo nga kahublagan sa kasyudaran naman nakahatag sang malahalang nga suporta pangpulitika sa mga prenteng gerilya nga ginaatake sang kaaway. Nakaamot ini sang pagpadupol sa paliwat-liwat nga pag-atake sang kaaway sa mga prenteng gerilya kag sa proseso

nakapatuhaw sang madamo nga boluntaryo nga rekrut sa BHB.

Bug-os ang kumpanyansa sang liderato sang Partido sa Southern Tagalog (ST) nga mapag-on ang puhunan para sa padayon nga magpabaskog kag bug-os kalig-on nga maghimakas sa malawigan nga inaway banwa. AB

Pasidungog kay Ka Toklai

Ang masunod ginkuha sa ginhanda nga pasidungog sang Rehiyunal nga Komite sang Partido sa Far South Mindanao.

Si Billy Berana (nakilala bilang Ka Toklai, Ka Berka, Ka Ebyong, Ka Goyot, Ka Zero kag iban pa) ang tunay nga hangaway sang banwa. Siya nabuhi kag napatay nga nagaalagad sang lubos ang tagipusuon sa pumuluyo. Ginhatag niya ang mayor nga bahin sang iya kabuhi para sa masang Lumad kag mangunguma. Kwarenta'y kwatro ka tuig siya sang mapatay kag halos 30 tuig nga nag-alagad bilang modelo nga rebolusyonaryo.

Si Ka Toklai napatay samtang nagapakig-away sa isa ka platun sang 73rd IB nga gulpe lang nga nagpatrulya sa isa ka ligwin nga barangay sang Malaparan, Sarangani sang hapon sang Enero 26. Upod sang iban pang Pulang hangaway nga naka-*ambush position*, maisog siya nga nakig-away, gamit ang iya ripleng M16, kag nakaigo sang pito ka suldado. Duha diri ang nakumpirma nga patay sa ospital.

Isa ka maayo nga organisador si Ka Toklai. Sa iya pagpamuno nakapasad ang mga kaupod sang madaku-dako nga baseng masa sa Compostela Valley, Cotabato, Bukidnon, Davao kag Sarangani. Siya ang gimbansagan nga "hari sang rekoberi" sa North Cotabato sining ulihi nga dekada bangud sa iya pagsulod sa mga teritoryo nga wala pa gid matilawi, gamit ang tuhay nga mga pamalagi. Bangud sa duna niya nga abilidad kag pagkamatinigahon, nakapakunu-kuno siya nga Lumad, mangunguma, estudyante, pastor, kubrador sang "last two," bolantero sang isda, biktima sang polyo kag iban pa. Madamo man siya nga nahibal-an nga lenggwahe kag sarang niya nga ilugon ang tuno sang masa sa lokalidad.

May instansya nga si Ka Toklai nagpakunu-kuno nga tinedyer nga babaye nga nagapangita sang iya mga paryente, gani nakahimo siya sang mga kontak kag nakaorganisa sang

mga grupo sang mangunguma nga sang ulihi nagserbi nga pang-umpisa nga baseng masa.



Maayo siya nga mag-adyas sa iya palibot. Natago niya ang iya tunay nga pangalan tubtob sa katapusan. Bisan kaaway wala siya makilala tubtob sang iya kamatayon.

Ginpalangga siya sang tuman sang pumuluyo. Diin man siya magkadto, ginabaton si Ka Toklai bilang anak, utod o abyan. Siya ang kadtuan sang mga tawo para ipaabot ang sari-sari nga mga problema tulad sang away sa duta, kahimtangan sa pagtrabaho, paghibalo sa layi, problema medikal kag bisan problema nga magasawa. Permi nga nagapalibot sa iya ang gamay nga mga bata para makig-abyan, magpangita sang pagtatap kag sang kalipay. Sa madamo nga kahigayunan, ginpangitaan niya sang balay

ang mga bata nga ilo agud indi sila magutom kag mapatay. Bangud siya mismo naghalin sa pamilya nga imol nga mangunguma, permi niya ginapanumdom sa tanan nga "samtang ang kaimulon kamatuoran nga indi malikawan, dapat naton permi tatapon ang mga bata, labi na ang mga bata sang mangunguma."

Samtang matinatapon kag mahalang siya sa mga bata, si Ka Toklai maisog nga Pulang hangaway nga namuno kag nagpasakop sa madamo nga taktikal nga opensiba. Sa iya malaba nga inagihan ilang gerilya, kag ang matalom nga paganalisa kag wala duha-duha sa kapagsik nangin malahalon nga sangkap sa kadalag-an sang madamo nga taktikal nga opensiba pareho sang sunud-sunod nga mga reyds sa Magpet, North Cotabato kag sa Dangcagan kag Quezon, Bukidnon halin 2005 tubtob 2007, sa mga operasyon disarma sa Malita, Davao del Sur.

Sa pihak sang madugay nga balatian sang likod, impeksyon sa itlog, rayuma, *sinusitis* kag pulu-panhon nga mga *seizure*, bisan kis-a wala maghigda si Ka Toklai. Puno siya sang kapagsik kag nakatalapon ang iya entusyismo. Amo gani nga iya asawa kag tatlo ka anak nga lalaki nga sa husto nga edad nabuyok nga mag-entra sa hublag kag mag-amot sa rebolusyon. Wala siya nag-untat sa pagkonsolida sang iya pamilya, sa pagpaidalom sang ila paghibalo sa rebolusyon kag importansya sang paghulag para sa banwa.

"Kaupod Derpa" (Pader o Tatay, hampang sa tinaga nga *father* sa lenggwaheng Ingles) ang angga nga tawag sa iya sang iya mga anak nga lubos nga pagpalangga nga nagaestorya bahin sa iya kag mga

"Ka Toklai..." sundan sa pahina 8



2 aktibista, ginpatay, maslider, gin-aresto

Duha ka upisyal sang barangay sa Compostela Valley kag Batangas ang ginpatay sang mga armadong ahente sang estado samtang isa ka lider sang mga Igorot ang iligal nga gin-aresto sa Nueva Ecija. Sa Samar, apat ka bata ang nangin biktima sang pagpang-abuso militar samtang sa Cagayan, duha ka mangunguma ang ginpintasan sang AFP.

Abril 15. Ginkulata sa dughan sang mga nagaoperasyon nga suldado si Roel Santiago, 38 anyos kag mangunguma sang Baryo Santor, Baggao, Cagayan. Nagapauli si Santiago sang masumalang niya ang mga suldado sa Sityo Culidag, Baryo Hacienda Intal kag ginpilit siya nga maggiya sang militar. Ginpahog man sang mga suldado si Edgar Campo, 48 anyos kag mangunguma sang Baryo Bacagan, Baggao. Ginpahog siya nga pagautdon ang iya kamalingking kon indi siya mag-ako nga nagapasaka sang mga kaupod.

Halin Abril 11 tubtob sa subong nagpwesto ang mga nagaoperasyon nga suldado sa mga kapilya kag *barangay hall* sang Bacagan, Hacienda Intal, Azing Via, Santa Margarita, Tungal kag Santor, samtang indi lang pila ka balay sang mga residente sa mga baryo nga ini ang ginpunduhan man nila. Ang malaparan kag batalyon kadaku nga operasyon nga ini ginlunsar sang 5th ID bilang *test mission*

sang bag-o nga nagtreyning nga mga suldado. Sakop sini ang mga banwa sang Baggao, Gattaran, Gonzaga, Sta. Teresita kag Buguey.

Abril 12. Gintiro tubtob nga mapatay sang isa ka wala makilala nga kriminal si Ricky Manrique, 49 tuig ang edad, sa iya nga balay sa Baryo Kingking, Pantukan, Compostela Valley. Gintiro siya sa atubang mismo sang iya anak kag asawa. Nagagum siya sang madamo nga igo sang bala sa ulo kag likod. Aktibo si Manrique batuk sa operasyon sang daku nga dumulong nga minahan sa prubinsya pareho sang Amerikano nga kumpanyang Russel Mining and Minerals. Myembro man si Manrique sang Anakpawis Party sa Compostela Valley, *convenor* sang Save Pantukan Alliance kag nagapamuno sang Boringot Small Scale Mining Cooperative at Federation of Miners Aggregation in Pantukan (FedMap).

Abril 11. Ginpatay si Kenneth Reyes, 28 tuig ang edad

kag residente sang Baryo Maguihan, Lemery, Batangas. Si Reyes ang kapitan sang nasambit nga barangay kag pangulo sang BAYAN-Batangas. Nagapauli na siya sa iya nga balay halin sa isa ka seminar sang siya tiruhon sang duha ka indi nakilala nga lalaki. Apat ang igo sang bala sang kal. .45 pistola ang nagtapos sa kabuhi ni Reyes.

Mabaskog nga ginkundenar sang BAYAN-Southern Tagalog ang pagpatay kay Reyes.

Ginpakamalaut man nila ang pahayag ni S/Supt. Alberto Supapo, hepe sang PNP-Lemery nga ang pagkapatay ni Reyes may kaangtanan sa droga kag personal nga banggianay. Suno sa BAYAN-ST, malisyoso ang pahayag ni Supapo kag gusto lang sini ipalayo ang imbestigasyon sa tunay nga motibo sang pagpatay.

Marso 22. Iligal nga gin-aresto si Ernesto Bubod, 54 anyos kag lider sang mga Igorot sa Sityo Maluyon, Baryo Villarica, Pantabangan, Nueva Ecija.

Suno sa panaysayon ni Lita Umas Bubod, asawa sang biktima, nagapahuway sila sa ila nga uma sang magpalapit ang lima ka lalaki nga nagpakilala nga mga tinawo sang Energy Development Corporation (EDC). Ginaimbitar nila kuno si Bubod nga mag-upod para pamangkuton bahin sa natabo nga pag-

"Ka Toklai..." halin sa pahina 7

naagyan. Sila mga malipayon kag may mapabugalan nga rebolusyonaryo nga nagaserbi nga bulawanon nga halimbawa sa iban pa nga rebolusyonaryo nga pamilya sa rehiyon. "Bilib man gyud mi sa iya, bisan sa iya pagkaamahan." (Dayaw kami sa iya, bisan sa iya pagkaamay), siling sang isa niya nga anak sa mga tawo nga nakiglubong sa ila amay.

Sa pihak sang tanan nga iya mga naangkong, si Ka Toklai mapainubuson nga rebolusyonaryo nga bukas sa mga saway kag suhestyon. Madali niya nga ginaako ang iya mga pagsayup kag

pagkulang kag nagatinguha siya sang husto nga tadlungon ang mga ini. Nagapamati man siya sa tanan, bata man o tigulang.

Sa idalom sang iya pagpamuno, nangin madali ang mga hilikuton nga daw imposible bangud sa kamagan sang iya personalidad kag sa iya pagkapalahog. Wala siya sang bisyo, luho o kapritso. Simple lang siya nga si Ka Toklai, ang aktibo kag palalahog nga rebolusyonaryo nga mangunguma nga naghalad sang iya kabuhi sa rebolusyon. Tubtob buhi siya nga magapabilin sa tagipusuon sang mga kaupod kag masa bilang mahal nga baganihan kag maisog nga lider. **AB**



pangsunog sa ila *reforestation area* sang Marso 17.

Nahibal-an sang ulihi nga ang mga nag-aresto kay Bubod indi mga tinawo sang EDC kundi mga suldado sang 81st IB. Maluwas sa *arson*, ginkasuhan man si Bubod sang *illegal possession of firearms* bangud may nakita kuno sila nga de-sabog nga nakasandig sa kahoy kon sa diin nagapahuway ini.

Ginkundenar sang Alyansa sang Magbubukid sa Gitnang Luzon (AMGL) kag Kalipunan ng Katutubong Mamamayan ng Pilipinas (KKAMP) ang pag-aresto kay Bubod. Suno sa AMGL, mabaskog ang militarasyon sa lugar nanday Bubod bangud sa ginahimo nga pribatisasyon sang *hydro-electric power plant* sa Pantabangan sang First Gen Hydro-Power Corporation. Kontrolado ini sang

Lopez Group of Companies nga nagapanag-iya man sa EDC. Aktibo si Bubod bilang lider sang tribo nga Kalanguya-Igorot sa lugar kag isa siya sa nagahimakas para pangapinan ang kadutaan sang mga Igorot nga gin-agaw sang mga dumuluong kag lokal nga kumpanya.

Marso 4. Apat nga bata nga nagaedad sang apat tubtob 12 tuig ang edad ang ginbiktima sang masobra 30 suldado nga naglunsar sang operasyon militar sa mga baw-ing nga bahin sang baryo Carolina, Matuguinao, Samar. Gulpe na lang ginsulod sang mga suldado ang balay sang mga bata kag ginpamangkot kon diin ang ila pusil. Ang mga bata nabilin nga wala sang nagaatipan bangud ang ila nga mga ginikanan ginpilit nga patambungan sang mga suldado sa isa ka pulong sa sentro sang banwa.

Ginsiling sang mga bata nga wala sila sang pusil. Apang indi magpati ang mga suldado kag ginpasibangdan ang mga bata nga nagabinutig. Naghalin lang ang mga suldado sang hambalan sila sang magulang nga bata nga kon indi sila magpati ukayon nila ang balay.

Antes ini, lima ka minutos nga nagpalupok ang mga suldado sa baryo para pahugon ang mga residente kag ginsunog nila ang isa ka balay nga yara sa gwa sang sentro sang barangay. Sang makasulod na sila sa barangay, pwersado nila nga gintipon ang mga residente sa plasa sang banwa para sa isa ka rali batuk sa BHB. Ang mga residente nga indi magtambong ginakadtuan sang mga suldado kag ginabato ang ila nga mga balay para mapilitan sila nga magkadto sa pulong. AB

Karaban batuk sa Balikatan 2011

Naglunsar sang serye sang mga aksyon protesta ang mga patriyotiko kag makabanwahanon nga organisasyong masa batuk sa US-RP Balikatan Exercises 2011 nga ginhiwat sa Central Luzon. Pinakaulihi ang karaban nga ginlunsar sang Kilusang Magbubukid ng Pilipinas (KMP) sang Abril 15 halin Quezon City pakadto sa Central Luzon.

Ginpuungan ang karaban sang mga pulis kag mga armadong bantay sang mag-abot sila sa Clark Special Economic Zone (CSPEZ) sa Angeles City. Apang ginduso sang mga raliyista ang ila nga kinamatarung para magtipon sang matawhay kag ginkuha nila ang mga barikada nga ginbutang sang mga pwersa nga pangseguridad sang CSPEZ.

Pagkatapos sang malip-ot nga programa kag pagsunog sang bandera sang US, nagderetso ang karaban sa Camp Servillano Aquino sa Baryo San Miguel, Tarlac City. Ginsumalang sila didto sang mga mangunguma halin sa Tarlac kag

United Luisita Workers Union (ULWU) kag sang Nueva Ecija sa idalom sang BAYAN-CL.

Ginpakamalaut sang nagralli ang Balikatan bilang pagtraidor sa pungsodnon nga kahilwayan kag pagbaliskad sa kadalag-an sang pumuluyo sang 1991 sang mapalayas nila ang mga base militar. Nagpahayag man sila sang disgusto kay Benigno Aquino III sa desisyon sini nga padayunon gihapon ini.

Siling sang mga mangunguma, wala sang serbi para sa mga mangunguma sang Central Luzon ang Balikatan. Sa baylo, ginahimo nga pamahog ang presensya sang mga

suldadong US kag Pilipino sa mga mangunguma nga nagapanindugan para sa ila nga mga kinamatarung pareho sang paghimakas nila sa Hacienda Luisita sang pamilya nga Cojuangco-Aquino.

Ang gintingub nga Balikatan Exercises 2011 (Abril 5-15) amo ang pinakadaku nga paghanas-militar halin sang maaprubahan ang Visiting Forces Agreement (VFA) sang dekada 1990. Gintambungan ini sang may 10,000 suldado (5,000 tropa sang US kag 5,000 tropa sang AFP). Kabahin sa paghanas ang paglunsar sang mapaniplang nga mga operasyong sibil-militar halin pareho sang serbisyo nga medikal, *dental*, beterinaryo kag aksyong sibiko.

Sa pihak sini, bisan ano pa ang himuon nga pagpatahom sang US kag rehimeng Aquino, indi sini matabunan ang kinaiya sang nasambit nga paghanas-militar bilang malapad nga *counterinsurgency operation* sang mga tropa nga Amerikano sa teritoryo sang Pilipinas. AB



"Makatawo" nga pagpasilabot ni Obama

Sang Marso 28, siyam ka adlaw pagkatapos bombahon ang Libya sang gintingub nga pwersa sang United Kingdom, France kag US, gindetalye ni Barack Obama, presidente sang US, ang iya "makatawo" nga polisiya pangluwas. Gilayon ini nga ginbansagan nga "doktrinang Obama" kag ginpabugal nga "mas makatarungan" kumpara sa "doktrinang Bush" sang unilateral nga militarista nga pagpasilabot.

Ginhatagan-rason ni Obama ang paggamit sang kusog kontra sa Libya, isa ka independyenteng pungsod, sa ngalan sang "pagsakdag sa mga sibilyan". Indi mahimo magpabungol-bungol ang US, siling niya, sa atubang sang "nagahana nga masaker" sang mga sibilyan. Indi dapat magpangduha-duha ang ang US nga maggamit sang kusog batuk sa mga kaaway sang katawhan, dugang pa niya, kon ini ang ginapangayo sang sitwasyon.

Sa balayon nga ini ginmandu niya ang pagpamomba sa Libya sang Marso gamit ang mga eroplano kag barko-de-gera sang US. Tuyo sini nga suportahan ang mga pwersa nga naglunsar sang armado nga pagbato sa gubyrno ni Moamar Gaddafi. Liw-as sa deklarasyon sang "pagsakdag sa mga sibilyan," ang ginhimo nga pagpamomba sang US kag iban pang pungsod sa idalom sang NATO nagresulta sa malaparan nga kahalitan sa kabuhi kag imprastrukturang sibilyan.

Pilit nga ginalaragway ni Obama ang agresyon sa Libya bilang "makatawo nga interbensyon militar sang malapad nga koalisyon nga demokratiko" para lainon ini sa "gera kontra-terorismo" sang nagligad nga rehimeng Bush. Pero sa gwa sang bansag, wala sang kinalain ang duha. Pareho nga ginlunsar ang "makatawo nga interbensyon militar" kag "gera kontra-terorismo" para sakdagon ang

mga interes sang US" sa rehiyon--ang malapad nga resorsa sang langis. Pareho sini ginagamit ang makahulubog nga gahum militar sa tradisyon nga "shock and awe" ni anay Defense Secretary Donald Rumsfeld. Pareho ini nga nagdulot sang kahalitan sa mga sibilyan kag mga istruktura nga di militar sa desperadong tuyo nga pulbuson ang depensa sang nakapungko nga mga rehimen.

Sang umpisa, ginpahayag ni Obama nga indi kabahin sang iya "doktrina" ang pagpatalsik sa nagapungko nga gubyrno sa Libya. Pero pagkatapos ang pila ka simana nga pagpamomba nga wala sang maathag nga katuyuan, direksyon o resulta, naggwa man ang matuod sang ginpahayag sang US nga imposible nga may ara sang "tunay nga reporma" sa Libya kon indi mapatalsik ang presidente sini nga si Gaddafi. Antes ini, direktang ginlapas sang US kag mga kaalyado sini ang soberanya sang Libya sang kilalahon nila ang mga armadong pwersa nga anti-Gaddafi bilang "lehitimong representante" sang pumuluyong

Libyan. Ini bisan pa gamay lang ang mga pwersa nga ini kag nakabase sa tatlo tubtob apat ka syudad sa pungsod.

Ginpagwa ni Obama kag mga kaalyado niya nga nagatindog sila kontra sa mga despotikong lider. Ginpabugal sang France kag US ang ila nga armado nga pagpasilabot nga nagpatalsik sa despotikong lider sang Ivory Coast nga si Laurent Gbagbo bisan pa nahibal-an sang tanan nga ang ginbulos nila nga si Alassane Ouattara nadalahig man sa pangmasaker kag pagpamintas sa pumuluyo sang Ivory Coast. Ang matuod nga tuyo sang armadong pagpasilabot sang US nga kuhaon sa poder ang mga lider nga indi magpaidalom sa kontrol sini.

Baliskad sa deklarasyon ni Obama, ginasuportahan sang gubyrnong US ang mga dikta-dor para sa kaugalingon sini nga kaayuhan. Sining nagligad nga bulan, halimbawa, ginsakdag sang US ang paggamit sang hari sang Saudi Arabia sang kusog para tapnaon ang nagahana nga hublag protesta sa pungsod. Wala man maghulag ang US sang mapintas nga ipiton sang papet sini nga gubyrno sa Kuwait ang nagahana nga mga protesta didto.

Sa Bahrain, ginsuportahan sang US ang Saudi Arabia sang magpadala ini sang mga tropa para mapintas nga piguson ang mga protesta batuk sa kaalyado sini nga monarkiya didto (nga nagapahanugot sa pagpabilin sang pinakadaku nga base nga nabal sang US sa rehiyon). Bisin pa man, wala sang interes ang US sa makatarungan nga mga protesta sa Yemen, Oman kag iban pang bahin sang North Africa.



Malapad nga protesta sa bilog nga kalibutan

Halin Disyembre 2010, higante nga mga aksyon-protesta ang sunod-sunod nga naglupok sa mga pungsod sa Middle East kag North Africa. Nakasentro ang mga ini sa pagpatalsik sa mga mapiguson kag korap nga nakapungko nga rehimen. Tampok sa mga paghulag nga ini ang militanteng pagduso sang mga pumulu-yo para sa disente nga pagpangabuhi sa atubang sang grabe nga krisis, lapnagon nga gutom kag disempleyo tuga sang pagpatuman sang mga polisiya sang imperyalista nga globalisasyon.

Kadam-an sa mga protesta gin-umpisahan sang mga es-tudyante kag pamatan-on, apang sang magdugay naglapta sa kubay sang mga obreros, propesyunal kag iban pang demokratikong sektor.

Nag-umpisa ang mga protes-ta sa Tunisia. Sang Disyembre 28, nagsunog sang kaugalingon ang isa ka lalaki bilang protesta sa lapnagon nga disempleyo, mataas nga presyo sang pagkaon kag pagpamigos sang estado. Ginpukaw sini ang kaakig sang pumuluyo sang Tunisia. Sang Enero, nag-alsa ang pumuluyo kag naglunsar sang mga higanteng demon-strasyon nga nakapatalsik kay President Zine El Abidine Ben Ali. Ginbuslan siya ni Fouad Mebazza.

Madason nga naglupok ang pag-alsa sa Egypt. Sa pihak sang hayagan nga pagpamigos, wala nalingkang ang halos 20-adlaw nga mga higanteng demonstrasyon sa Tahrir Square, sentro nga kalsada sa Cairo. Ginpwersa sini ang pagresayn ni Hosni Mubarak kag gintapos ang iya 39-ka-tuig nga paghari. Li-wat nga naglupok subong nga Abril ang mga aksyon protesta batuk sa nagbulos nga konseho militar para iduso ang pagsilot kay Mubarak kag pagpatuman sang demokratikong reporma.

Sa Bahrain, linibo ka pumu-luyo ang nagprotesta umpisa Pebrero 14 para patalsikon ang monarkiya kag iduso ang

kahilwayan sa pulitika kag pag-pahayag. Wala napunggan ang paglapad pa sang mga ini sa pi-hak sang mapintas nga pag-pamigos. Sang Marso 15, gin-deklarar ang layi militar. Pagkaaga, ang demonstrasyon nga anti-monarkiya mapintas nga gintapna sang estado nga ginsuportahan sang mga tropa halin sa Saudi Arabia sa hingyo sang prinsipie sang Bahrain. Bunga sini napatay kag napi-lasan ang madamo nga raliyista.

Sa Syria, nagsugod ang mga protesta batuk sa rehimeng As-sad sang Enero 16. Mapintas ini nga gintapna sang rehimen pero ginpadayon sang pumuluyo ang ila nga mga paghulag. Sang Pe-brero, may ara sang reporma sa lokal nga gubyrno, lakip ang pagresayn sang pila ka upisyal, kag mga konsesyon sa pangabuhian sang pumuluyo.

Sa Yemen, naglupok ang mga protesta sa katung-anan sang Enero batuk sa lapnagon nga gutom kag disempleyo kag para sa pagbag-o sang konstitusyon nga nagpabilin sa paghari sang monarkiya.

Sa Oman, ginpanawa-gan sang mga nagprotesta ang pagpataas sang sweldo, dugang nga trabaho kag pagpanubo sa presyo sang mga balak-lunon. Sa tuyo nga pahinaon ang mga protesta, tatlo ka sulit nga ginbalasa sang Sheikh (hari) ang iya


nga kabinete kag naglunsar sang mga programa para kuno magtuga sang 50,000 bag-o nga trabaho. Ginpataasan man sang Sheikh ang sweldo sang tanan nga mga mamumugon.

Sa Algeria, nag-umpisa ang lainlain nga protesta sang Disyembre 2010 kag nagpada-yon tubtob Pebrero 2011. May ara man nga mga kapareho nga paghulag sa Djouboti, Jordan, Iran, Iraq kag Morocco.

Paghublag sa Europe

Sa isa ka bahin sang kalibu-tan, naglupok man ang kaugot sang pumuluyo. Minilyon ka obreros kag pumuluyo ang nag-protesta sang Abril 3 sa lainlain nga syudad sa Europe batuk sa mga pagkaltas sa galastuhon sosyal, pagbuhin sang pensyon, malaparan nga disempleyo kag nagatinaas nga presyo sang mga balaklon. Ginpakamalaut nila ang pagkainutil sang ila gubyr-no nga lubaron ang nagapalala nga krisis sa ekonomya. Ang ad-law sang paghulag o Day of Ac-tion ginpanawagan sang mga unyon kag organisasyong masa.

Sa Germany, 500,000 ang nagmartsa sa lain-lain nga syu-dad. Katunga si-ni nagtipon sa Berlin, kapital sang pung-





sod. Nag-abot man sa 500,000 ang nagralli sa Rome, Italy. Nag-upod man sa Adlaw sang Paghulag ang mga mamumugon sa 14 pa ka pungsod sa Europe.

Sini man nga Marso 26, humugos sa mga dalanon sang London, United kingdom ang halos tunga sa milyon ka mamumugon. Ini ang pinakadaku nga demonstrasyon didto sa sulod sang napulo ka tuig. Ginpakamalaut nila ang gubyerno Cameron sa ginhimo sini nga 80 bilyon o P5.64 trilyon nga pagkaltas sa mga gas-tusin nga pangserbisyo.

Mga aksyon-protesta sa US kag iban pa nga pungsod

Sustenido man ang paghulag kontra sa mga pagkaltas sa galastuhan sosyal sa lainlain nga bahin sang US. Isa sa pinakadaku ang paghulag sang mga mamumugon kag pumuluyo sang estado sang Wisconsin batuk sa hagna nga kuhaon ang ila nga kinamatarung nga makignegosasyon para sa *collective bargaining agreement* bilang bahin sang pagbuhin sang galastuhan sang lokal nga gubyerno.

Sa India, nag-bot sa 200,000 ang nagralli sa New Delhi sang Pebrero para pakamalauton ang nagatinaas nga presyo sang pagkaon kag pagkainutil sang gubyerno diri para panubun ang mga ini. May ara man sang kapareho nga paghulag ang pumuluyo kag mga unyon sa Indonesia, Vietnam kag Burma.

Sa Honduras, 40,000 manunudlo ang naglunsar sang isa ka bulan nga welga bilang protesta sa pagbuhin sa badget sa edukasyon. Nagbalik lang sila sa trabaho sang Abril 9. Linibo naman ka mamumugon ang nagprotesta batuk sa malaparan nga pagpahalin kag disem-pleyo sa Mexico. AB

Nagalala ang krisis sa Portugal

Napilitan nga magpasalbar ang pungsod nga Portugal sa European Union (EU) sang Abril 6 bangud sa ginabatas sini nga paglala sang krisis sa ekonomya kag pulitika. Ang Portugal ang ikatlo nga pungsod (pagkatapos ang Ireland kag Greece) sa Europe halin 2008 nga nagpangayo sang pundo para sa “bailout”.

Ang “bailout” nagabalor sang P116 bilyon halin sa Rescue Fund sang UE kag IMF.

Kabaylo sini, ginaobligar ang Portugal nga buhinan ang mga galastuhan sosyal (para kuno mag-uswag ang ekonomya) anupaman ang mangin reaksiyon sang pumuluyo.

Tuman kabudlay nga liwat makapangutang ang Portugal bangud sa daku na nga pangpubliko nga utang sini kag daku sang depisit sa badyet. Halin 59.8% sang Gross Domestic Product (GDP o balor sang lokal nga produksyon) sang 2004, nagtimbuok ini pakadto sa 83.2% sang GDP subong nga tuig. Ang \$500 bilyon nga utang sa gwa sini katumbas man sang 223% sang GDP.

Lapnagon ang disempleyo nga nagalab-ot sa 11.1%. Halos katunga sang mga pamatan-on wala sang pangabuhian.

Ang mga pagkaltas sa galastuhon pangkatilingban halin 2009 nagbunga sang malapad kag sige-sige nga mga aksyon-protesta sang mga mamumugon kag pumuluyo halin sang ikatlo nga kwarto sang 2010.

Halin Enero tubtob Abril 2011, masobra napulo ka daku nga aksyon-protesta ang ginhiwat sang mga Portugese. Masobra 500,000 ang nagralli sang Marso 12 sa Lisbon, kabisera sang pungsod. Sang Marso 23, napilitan nga magresayn sa pwesto si Prime Minister Jose Socrates. Isa ka *caretaker government* ang nagadumala subong sa pungsod. AB

“Kalbaryo sang mga tsuper” subong nga Semana Santa

GINTAWAG nga “Kalbaryo sang mga Tsuper” ang aksyon protesta sang mga drayber sining Semana Santa umpisa Abril 20. Ara ini sa pagpamuno sang Pinag-isang Samahan ng mga Tsuper at Operators Nationwide (PISTON). Ang aksyon protesta tuga sang pagtaas sang presyo sang langis sining Abril 19.

Sa ika-13 beses nga pagsaka sang presyo sang langis halin Enero 2011, ginabenta na sang P46.70 tubtob 49.25 kada litro

ang krudo, (25 sentimos nga dugang), P54.30 tubtob 61.51 kada litro ang gasolina (60-70 sentimos nga dugang), kag P56 kada litro ang gaas (40 sentimos nga dugang). Magapataas man sang P1 sa presyo kada kilo ang 11-kilo sang tangke sang LPG.

Antes ini, naglunsar sang *noise barrage* sang Abril 13 ang lainlain nga organisasyong masa sa Katipunan, Quezon City; Marikina Bridge, Marikina

City; San Juan City; Sucat Road sa Paranaque City; San Roque National High School kag sa Dypac Compound sa Tondo, Maynila. Ginaduso sang PISTON ang gilayon nga pagbasura sa Republic Act 8479 o ang Oil Deregulation Law.

Naglunsar man sang aksyon protesta ang Gabriela-National Capital Region sa Trabajo Market sa Maynila para idemanda nga pataason ang sweldo kag kuhaon ang *e-vat* sa langis.

Pagdampig sang Korte kay Cojuangco, ginkundenar

Mabaskog nga ginkundenar sang mga organisasyon sang mga mangunguma ang desisyon sang Korte Suprema nga kilalahon nga ginapanag-iyahan ni Eduardo “Danding” Cojuangco, Jr. ang 20% sang mga sapi sa San Miguel Corporation (SMC) nga ginbakal gamit ang mga pondo sang *coco levy*. Kaladlawan nga ginsiling sang Korte Suprema nga wala kuno napamatud-an ang malapit nga relasyon ni Cojuangco sa daan nga diktador nga si Marcos.

Sanday Marcos kag Cojuangco ang nagpamuno sadto sa pagpan-golekta sang buhis halin sa mga manugniyog para kuno sa ila nga kaayuhan. Ang pondo nga natipon diri ginpaidalom sa Coconut Industry Investment Fund nga gingamit para tukuron ang United Coconut Planters Bank. Bilang upisyal sang UCPB, gingamit ni Cojuangco ang pondo sang *coco levy* para baklon ang 47% sapi sang SMC. Ginsekwester ini sang gubyernong Aquino sang 1986.

Ginpakamalaut sang PKP ang desisyon sang Korte Suprema. Siling sini, maathag nga kabayaran ini ni Benigno Aquino III kabaylo sang pagsuporta ni Cojuangco sa iya kampanya sang nagligad nga eleksyon. Isa si Cojuangco nga naghatag sang pinakadaku nga balor sang pondo nga pangkampanya ni Aquino, kag iya ini nga tiyo.

Suno kay Anakpawis Rep. Rafael Mariano, ang desisyon sang Korte Suprema paglapak sa kinamatarung sang gamay nga manugniyog nga ginpwera nanday Marcos kag Cojuangco nga magbayad sang *coco levy*. Wala san-o man napanginpuslan sang manugniyog ang pondo nga ini.

Sa Lucena City, nagahanda nga magpasaka sang *motion for reconsideration* ang Coconut Industry Reform Movement batuk sa desisyon sang korte. Sang Abril 14 naghimo sang aksyon protesta ang mga grupo sang mangunguma sa atubang sang upisina sang Korte Suprema.

Mga tagabista kay Gutierrez, napili na

GINHANDA na sang Kongreso ang 11 kongresman sini nga magserbi nga *prosecutors* o tagabista sa kaso nga *impeachment* kontra kay Ombudsman Merceditas Gutierrez. Pangunahan ini ni Iloilo Rep. Niel Tupaz Jr. ang grupo upod ang mga kongresman nga abogado man. Ini amo sanday Rep. Erin Tanada (Quezon), Rep. Rodolfo Farinas (Ilocos Sur), Rep. Federico Quimbo (Cavite), Rep. Elpidio Bargaza (Oriental Mindoro), Rep. Reynaldo Umali (Oriental Mindoro), Rep. Arlene Bag-ao (Akbayan), Rep. Emilio Abaya (Cavite), Rep. Magtanggol Gunigundo (Valenzuela City), Rep. Raul Daza (Northern Samar) kag Bayan Muna Rep. Neri Colmenares. Tum-ukan ni Colmenares ang kaso sang “Euro generals.”

Ginbuyok man sang Bagong Alyansang Makabayan (BAYAN) ang pagpili sang Kongreso sang maayo nga pribadong abugado para labi nga matum-ukan sa kaso si Gutierrez. Kaangut sini, nagpahayag ang National Union of Peoples’ Lawyers (NUPL) nga magabulig ini sa kaso.

Samtang, nagpulong ang lainlain nga sektor sa pagpamuno sang BAYAN para handaan ang mga aksyon protesta batuk kay Gutierrez kag mga ligal nga tikang para makuha siya sa pwesto.

Natalana ang pagbista sa *impeachment* kay Gutierrez sa mismo adlaw sang pagbukas sang Senado kag Kongreso sa Mayo 9.

Plano nga pagpakig-areglo sa mga Marcos, ginpakamalaut

NAGAPANAWAGAN ang Partido Komunista sang Pilipinas sa pumuluyong Pilipino nga pamatukan ang mga tikang sang rehimeng Aquino para maki-pag-areglo sa pamilya kag mga suluguon sang anay diktador nga si Ferdinand Marcos. Kabahin sang bag-ong areglo ang pagpahanugot sa pamilya nga Marcos nga ilubong na ang bangkay sang anay diktador sa Libingan ng mga Bayani. Ginaduso ini subong ni Salvador Escudero, suluguon sang anay nga diktador.

Ang tikang nga ini hayagan nga insulto sa mga biktima sang paglapas sa tawhanong kinamatarung sa idalom sang diktadurya nga US-Marcos. Nagalab-ot sa 70,000 ang iligal nga ginkulong samtang minilyon pa, labi na sa kaumhan, ang nag-agi sang kapintas sa kamot sang mga tinyente ni Marcos.

Wala pa nasilutan sang anuman nga rehimen ang sino man sa mga kapamilya kag mga kroni ni Marcos. Pila sa ila nagapasundayag pa sa gahum kag may daku nga impluwensya sa reaksyunaryo nga gubyerno. Si Imelda Marcos kag ang iya nga mga anak mga upisyal subong sang lainlain nga sanga sang gubyer-no. Ang pangunahon nga tagapatuman sang layi militar nga si Juan Ponce Enrile subong presidente sang Senado. Sanday Panfilo Lacson kag Gregorio Honasan mga senador. Pila lang sila sa mga anay tinyente nga nagtortur sang mga anti-Marcos nga aktibista paagi sa *water cure*, pagkuryente kag iban pa nga pamaagi sang pagpamintas kag abuso nga pisikal.

Editorial

Ipautwas sa Mayo Uno ang kaakig batuk sa rehimeng US-Aquino

Lubos nga matarung nga dumdumon ang maabot nga Mayo Uno bilang Adlaw sang Kaakig. Nagakadapat lamang nga ipautwas sang masang anakbalhas kag pumuluyong Pilipino ang ila kaakig sa rehimeng Aquino.

Madasig nga naga-us ang pangabuhian sang mga mamumugon kag pumuluyo. Makaligad ang halos isa ka tuig sa idalom ni Aquino, tanan nga mga promisa nga pagbag-o wala sang gindulot nga pag-ayo sa pangabuhian sang pumuluyo.

Sa sulod lang sang pila ka bulan halin nga nagpungko si Aquino, nagsaka na sang masobra 15% ang presyo sang mga pangunahon nga balaklon kag serbisyo. Wala siya sang ginhimo nga kontrolon ang presyo. Siya pa mismo ang nagtulod sang sukot sa mga tren kag *expressway*. Nangin inutil siya sa atubang sang nagapadayon nga pagtaas sang presyo sang mga produktong petrolyo. Ginapabay-an niya nga magtimbuok ini bangud sa daku nga buhis nga makolekta sang iya gubyrno halin diri. Nagapa-inosente siya sa pag-antus sang banwa.


Kon anu-ano nga tiko nga rason ang ginahaboy ni Aquino para balabagan ang sig-nipikante nga pagpataas sang sweldo. Kaladlawan nga ginapamilit niya nga tuman kanubo lang sang tantos sang implasyon gani indi kinahanglan nga pataasan ang minimum nga sweldo! Baliskad ini bisan sa mga ginduktor nga datos sang mga ahensya sang gubyrno.

Ginapahug sang daku nga kapitalista nga ang ginapakig-

bato nga P125 nga pagtaas sang sweldo magapadaku kuno sa tantos sang implasyon. Ginainsister man nila nga makaputo ini sang gamay nga mga negosyante kag magaresulta sa labi nga pagdamo sang wala sang trabaho.

Kadaluk sa ganansya ang matuod nga ara sa likod sang pagbalabag sa P125 *across-the-board* nga pagtaas sa sweldo. Ang matuod nga katumbas lamang ini sang 15% sang ganansya sang kadam-an nga mga kapitalista sa Pilipinas. (Lantawon ang kaangut nga artikulo.) Pero indi ini basta-basta ihatag sang mga daluk nga kapitalista nga nagakabuhi sa balhas kag dugo sang mga mamumugon.

Ang pagbalabag ni Aquino sa singgit para sa matarung nga sweldo nakasandig sa dikta sang tunay niya nga mga “boss”, ang mga imperyalista kag lokal nga burgis kumprador nga nag-amot sang daku nga kantidad sa iya kampanya. Interes



Mga tampok sa isyu nga ini...

Unyon, nagpaabot sa NDFP
PAHINA 3

Pasidungog kay Ka Toklai
PAHINA 7

Protesta sa bilog nga kalibutan
PAHINA 11

Mga pagsulundan sa pagbalhag

1. Ang **ginsundan nga pahina**, nga eksakto nga kopya sang pahina 1 maluwas sa mas malus-aw ang *masthead* o *logo* para sa mga nagagamit sang *mimeo machine* o naga-imprenta sa pamaagi nga *v-type*. Gindisenyo ini para indi madali masamad ang istensil.

2. Pag-*print* sa istensil:

- a) Sa *print dialog*, i-check ang **Print as image**
- b) Kuhaon ang *check* sa **Shrink oversized pages to paper size**
- k) I-click ang **Properties**
- d) I-click ang **Advanced**
- e) Siguruhon nga naka-set sa **100%** ang **Scaling**
- d) Padayunon ang pag-*print*

3. Ginabuyok ang mga kaupod nga ipaabot sa editoryal istap sang *AB* ang anuman nga problema angut sa pagbalhag paagi sa *v-type*. Magpadala sang *e-mail* sa angbayan@yahoo.com.